

Fræðslunefnd



Langanesbyggð

Stjórnskipuleg staða

Nefndin heyrir beint undir sveitarstjórn og fer með verkefni leikskóla, grunnskóla, einnig fer nefndin með málefni tónlistarskóla og framhaldsskóla eftir því sem við getur átt og öðrum þeim verkefnum sem henni eru falin samkvæmt samþykktum nefndarinnar.

Skipan nefndarinnar

Í fræðslunefnd eiga sæti 4 fulltrúar, sem sveitarstjórn kýs til fjögurra ára, að afloknum sveitarstjórnarkosningum, samkvæmt ákvæðum sveitarstjórnarlaga og samþykktar um stjórn sveitarfélagsins Langanesbyggðar. Á sama hátt eru kjörnir 4 fulltrúar til vara. Sveitarstjórn Langanesbyggðar kýs formann nefndarinnar en á fyrsta fundi hennar kýs nefndin sér sjálf varaformann. Auk þess á sæti í nefndinni 1 fulltrúi frá Svalbarðshreppi samkvæmt samstarfssamningi og á sama hátt 1 fulltrúi til vara.

Auk kjörinna nefndarmanna á sveitarstjóri rétt á að sitja fundi nefndarinnar með málfrelsi og tillögurétt.

Nefndin skal reglulega funda með eftirtöldum aðilum.

Þegar fjallað er um málefni grunnskóla:

1. Skólastjórar grunnskóla eða aðstoðarskólastjórar í forföllum skólastjóra.
2. Fulltrúi kennara
3. Fulltrúi foreldra grunnskólabarna.

Þegar fjallað er um málefni leikskóla:

1. Skólastjóri leikskóla
2. Fulltrúi leikskólakennara
3. Fulltrúi foreldra leikskóla.

Þegar fjallað er um málefni tónlistarskóla:

1. Skólastjóri tónlistarskóla
2. Fulltrúi foreldra barna í tónlistarskólanum.

Þá er nefndinni heimilt að kalla til sín sérhvern þann er tengist þeim málefnum sem nefndin fjallar um hverju sinni.

Hlutverk

Hlutverk fræðslunefndar er að fara með fræðslu- og skólamál samkvæmt þeim lögum og reglugerðum sem kunna að gilda um viðfangsefni hennar. Nefndin hefur eingöngu heimild til þess að stofna til útgjalda sem þegar eru að finna í gildandi fjárhagsáætlun sveitarfélagsins hverju sinni. Aðrar útgjaldatillögur skal leggja fyrir sveitarstjórn í formi sérstaks erindis sem tekið er til afgreiðslu á fundi nefndarinnar og fært í fundargerð og öðlast þær ekki gildi fyrr en með samþykkt sveitarstjórnar. Nefndin gerir tillögur til sveitarstjórnar og meðal hlutverka hennar er:

- Að vera tengiliður sveitarfélagsins við fagstofnanir og fagnefndir um stefnumótun á vettvangi fræðslumála og skal nefndin ávallt leitast við að fylgjast með umræðu um þau málefni sem snerta starfssvið hennar.
- Að starfa og hafa frumkvæði að margvíslegum málefnum sem snerta starfssvið nefndarinnar og sem nefndinni kann að vera falið af sveitarstjórn með hliðsjón af lögum og reglum sem við eiga hverju sinni.
- Að stuðla að gerð samræmdrar símenntunaráætlunar fyrir þá starfsemi sem undir nefndina heyrir í samráði við viðkomandi skólastjóra og forstöðumenn.
- Að móta skólaflokkum fyrir sveitarfélagið og vera sveitarstjórn til ráðgjafar um þau málefni sem undir nefndina heyra.
- Að stuðla ávallt að frjórri umræðu og hafa frumkvæði að markvissu starfi í þessum málaflokkum og samstarfi við þá aðila sem starfa á sama sviði.
- Að stuðla að samvinnu og samhæfingu skólastofnana og skólastiga innan sveitarfélagsins.
- Að vera skólastjóra til samráðs um ráðningu kennara og annarra starfsmanna skólans.
- Að fjalla um skólamannvirki og nýtingu þeirra.
- Að vera sveitarstjórn og skólastjóra til ráðgjafar um vistun barna í skóla utan skólatíma.
- Að veita sveitarstjórn umsögn um fyrirkomulag heilsugæslu í skólum. Að fara með málefni framhaldsskóla fyrir hönd sveitarfélagsins.
- Að veita sveitarstjórn umsögn um fyrirkomulag á skólaakstri.
- Að yfirfara drög að fjárhagsáætlun vegna þeirra málaflokka sem undir starfssvið nefndarinnar heyrir og eftir atvikum koma með tillögur að breytingum

Nefndin skal leitast við að ná því grundvallarmarkmiði að tryggja að ákvarðanir hennar og athafnir séu ávallt í þágu allra íbúa sveitarfélagsins og að fulltrúar í nefndinni setji ávallt almannahagsmuni ofar öðrum hagsmunum.

Starfshættir

Um starfshætti nefnda er sérstaklega getið í samþykktum um stjórn sveitarfélagsins Langanesbyggðar og skal þeim fylgt þar sem við á s.s. um boðun funda, fundargerðir, stjórn á fundum, fundarsköp o.fl.

Fræðslunefnd kemur saman fyrir luktum dyrum á fastákveðnum fundartíma. Skal nefndin gera samþykkt um fundartíma á fyrsta fundi sínum. Skytt er að boða til fundar ef meirihluti aðalmanna nefndarinnar krefst þess. Nefndin skal að jafnaði funda eigi sjaldnar en átta sinnum á ári.

Formaður sér um boðun funda í samráði við sveitarskrifstofu. Fundarboðun skal vera skrifleg og tilgreina fundarstað, tíma og dagskrá. Fundarboð skal sent öllum fulltrúum og öðrum sem seturétt hafa á fundinum eigi síðar en tveimur sólarhringum fyrir fund. Aukafund má boða með sólarhrings fyrirvara. Nefndinni er heimilt að ákveða að fundirnir verði boðaðir með rafrænum hætti.

Fundur telst ályktunarhæfur ef meirihluti kjörinna nefndarmanna er mættur á fund. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

Formaður nefndarinnar skal halda sveitarstjóra upplýstum um störf nefndarinnar.

Eftirfylgni

Formaður fræðslunefndar skal snúa sér til sveitarstjóra með eftirfylgni staðfestra samþykpta nefndarinnar sem sér um að ákvarðanir sem teknar eru af hálfu sveitarstjórnar komist til framkvæmda.

Réttindi og skyldur fulltrúa

Um réttindi og skyldur fulltrúa í fræðslunefnd gilda ákvæði sveitarstjórnarlaga og samþykktar um stjórn sveitarfélagsins Langanesbyggðar, eftir atvikum, s.s. til að mynda með vísan til IV. kafla í samþykkt sveitarfélagsins um réttindi og skyldur sveitarstjórnarmanna.

Lög og reglugerðir

Í störfum sínum skal nefndin taka mið af þeim lögum og reglugerðum sem gilda um starfssvið hennar. Þá skal nefndin fylgja sveitarstjórnarlögum og samþykktum um stjórn sveitarfélagsins Langanesbyggðar eins og þau eru á hverjum tíma.

Samþykkt í sveitarstjórn Langanesbyggðar **12. maí 2015**

Elías Pétursson
sveitarstjóri